

Król Kazimierz Wielki zatwierdza wilkierz spadkowy krakowskiej rady miejskiej, 13 I 1363.

Kodeks dyplomatyczny miasta Krakowa, t. I, cz. 1, wyd. F. Piekosiński, Kraków 1885, nr 35, s. 41-43.

Odczyt: Kamil Sorka

Casimirus dictus Magnus rex Poloniae, civibus Cracoviensibus villas *Czarna wieś*, *Czarna ulica* et *Pobrzezie* C marcis grossorum Pragensium vendit, incolasque earumdem villarum iurisdictioni consulum Cracoviensium subiicit. Insuper emporium lanae caprinae in civitate Cracoviensi instituit, nec non et leges quasdam a consulibus Cracoviensibus sancitas ratas esse iubet.

(I)n nomine Domini amen. [Noverint quibus expedit uni]uersi, tam presentes, quam futuri, quod nos Kazimirus Dei gracia Rex Polonie, necnon terrarum Cracovie, Sandomirie, Syriade, Lancicie, Cuyavie, Pomoran[ie], Russieque dominus et heres, di]versitatem iurium temporalium, que inter incolas Civitatis nostre Cracoviensis et ipsius suburbia, specialiter ante portam Sutorum actenus viguerunt et multum discrepa[re videbantur, sub potestate uni]us iuris et iudicii ponere et perpetuo conservare volentes, ut ex eo ipsi Civitati et utriusque incolis perpetuus honor et profectus constanter crescat et augeatur, exnunc villas [et possessiones nostras] infrascriptas, videlicet *Czarnawes*, *Czarnaulicza* et *Pobrzeze* eidem Civitati Cracoviensi ante dictam portam Sutorum adiacentes, prout dicte ville seu possessiones in suis circumferen[cialibus insigniis] distincte noscuntur ab antiquo, cum omnibus et singulis incolis ipsarum, prout ad iudicium Castri nostri Cracoviensis retroactis temporibus noscebantur pertinere, iudicio Theutonicali et potestati ho[nestorum vi]rorum consulum ipsius Civitatis Cracoviensis vendidimus pro centum marcis grossorum pragensium numeri Polonicalis, XLVIII^{to} grossos pro marca qualibet computando, et tenore presencium ratione huius[modi iu]dicii, iurisdiccioni et potestatis perpetuis temporibus vendendo, subicimus, ascribimus, annectimus et incorporamus. Ita, quod iidem incole villarum predictarum pro causis magnis et parvis non coram aliquo alio, nisi coram consulibus sepedicte Civitatis Cracoviensis, qui pro tempore fuerint, aut coram avvocato ipsis per eosdem deputato, eo iure, quo gaudent incole ipsius Civitatis Cracoviensis, respondere teneantur. De quibus eciam incolis ipsi consules omnes penas magnas et parvas pro se recipiendi plenam habeant potestatem; censum vero annum in eisdem villis, prout alias tollebatur, pro nobis et nostro thezauro perpetuis temporibus complete reservamus. Circa quam vendicionem et empcionem iurisdiccioni supradicte specialiter fuit expressum, quod super omnibus discordiis et controversiis iudicialibus, que inter ductores lignorum seu plaustrarios eorumque socios, vulgari Theutonico *flosser* nominatos, quocumque modo intra limites dictarum villarum emergere fuerint, in quantum in fluvio *Wyssle*, ad iudicium Castri Cracoviensis seu ad procuratorem, qui pro tempore fuerit, in quantum autem in littore sive in terra fuerint exorte, ad iudicium et iurisdiccione[m] .. consulum Civitatis Cracoviensis sepedicte sentenciandi et puniendi plena potestas eorumdem debet pertinere. Preterea in publicum deducimus per presentes, ut effectualiter appareat, quia Civitatem Cracoviensem et incolas in ea degentes sepedictos gracia

prosequimur et favore speciali. Exnunc de benignitate nostra regia damus depositum, quod vulgariter dicitur *Nyderlage*, ipsi Civitati ad honorem et omnibus incolis ipsius ad utilitatem, commodum et profectus de omnibus Pylis Caprarum, vulgariter dictis *Cygenhor*, venientibus de terra nostra Russye et presertim de Civitate nostra Lemburgensi, omnibus et singulis nostri Regni incolis, de quibuscumque civitatibus seu locis fuerint, dictos Pilos emendi, et in Cracovia deponendi, vel incolis dicte Civitatis vendendi plenam tradimus facultatem. Ita quod huiusmodi pili non alias nisi in ipsa Civitate Cracoviensi nomine veri depositi per quemlibet mercatorem debent [deponi et a]binde sub privacione omnium bonorum publice vel occulte per quempiam non abduci. Sed ibidem omnes tam divites quam pauperes intra muros Civitatis Cracoviensis duntaxat et extra [ad gremium ipsius] Civitatis pertinentes, qui laborare cum eisdem pilis voluerint, Pylea seu alia queque negocia conficiendo, in quibus ipsorum investigare poterint melioracionem, exnunc laborandi et [conficiendi perpetuis temporibus] plenam habeant potestatem. Ceterum perpetue memorie omnium et singulorum presentibus declaramus, quia laudabiles viri .. consules Civitatis Cracoviensis sepedicte, ipsorum innata prudencia [presencia et futura sane preten]dentes ad tollendas dubietates de remanenciis morticiniorum suppellectilium, que vulgariter *Rade* nominantur, super quibus sepissimis altercacionibus, dispendioso tedio occu[pabantur, ob laudabilem consuetudin]em, que pro iure poterit observari, quosdam articulos infrascriptos pro se et suis successoribus ac communitati Civium ipsius Civitatis Cracoviensis perpetuis temporibus observandos [dictaverunt, petentes humiliter eosdem] articulos per nostram maiestatem approbari et confirmari. Quorum articulorum sententia dinoscitur esse talis: Quod quandocumque vxor alicuius civis Cracoviensis [decesserit ab hac luce, tunc omnia] suppellectilia non ad aliquem alium, nisi ad maritum et ad pueros ipsius cuiuscumque sexus fuerint, debent pertinere, aliis omnibus propinquis pen[itus exclusis. Si vero pueri non fueri]nt, extunc omnia suppellectilia, que predicta uxor mortua ad maritum eius apportauerat, vel eciam dictorum suppellectiliorum remanencie sorori dic]te mortue aut cognate ipsius in linea] consanguinitatis propinquiori de iure presententur. Si autem aliquis virorum prima sua uxore defuncta et secunda, et contraxerit cum tertia, idemque v[ir] precedat ab hac vita, extunc omnia suppellectilia,] que ipsorum tempore per eos conquisita sunt parte ab utraque, non ad alium, nisi ad solam relictam devolventur et pertinebunt, contradiccione cuiuslibet [penitus quiescente. Nos vero considerantes su]pradictos articulos multum bene fore dictatos et communitati Civitatis Cracoviensis predicte congrue et necessario approbatos, ad [instantes petitiones consulum predictorum de benignitate nostra re]gia ipsos articulos una cum omnibus aliis premissis approbamus, perpetuamus et presencium per tenorem confirmamus. Harum quibus sigillum nostrum est app[ensum testimonio literarum. Actum Cracovie in octava E]pyphanie Domini, sub anno Domini millesimo CCC^o sexagesimo tercio. Presentibus hiis Testibus: Iohanne Castellano Cracoviensi, Iohanne [Palatino Sandomiriensi, Iohanne Cancellario Cracoviensi,] Petro Woyniciensi, Zawyssa Sandecensi Castellanis et Bodzantha procuratore generali, ac aliis quampluribus testibus fidedignis. Datum [per manus domini Iohannis Cancell]arii Cracoviensis supradicti, scriptum autem per Nicolaum Bohemum, notarium Curie nostre, canonicum Ecclesie Wysliciensis.

[hasła: wilkierz, Kraków, mieszczanie, prawo miejskie, wdowa, wdowiec, dziedziczenie beztestamentowe, dziedziczenie między małżonkami, krewni, rzeczy ruchome, sprzęty domowe, dzieci, dziedziczenie kobiet]